

體妙神靈伏龍虎而出昏衢踏鸞鶴而歸洞
府其或初離俗網乍入玄門性天未徹心地
尚迷切宜遵守準繩久則不違模範侍師敬
友念道思真常於性命上留心莫向利名中
掛意行須緩步語戒謹謹勿歌天艷之詞莫

講是非之事公私出幹不許見燈而迴打坐
絕言直待鐘鳴而起來時明白掛搭去時對
衆抽單稍有違犯量其罪咎輕則香油茶餅
重則竹笮下山偷盜分文毀燒衣鉢飲酒賭
博不許在堂職事有違理當倍罰故茲榜示
各令知悉

頌曰

五湖雲水混塵一堂既集徒侶須明紀綱或
凡或聖時隱時彰神化無定道規有常

清閣跋

可委者命可憑者天人無常爾事不偶然上
天生我上天死我一聽於天有何不可時有
待識物有枯榮人有衰盛事有廢興龍不冬
躍螢能夜飛君子小人而皆有時仲尼再思
曾參三省子何人哉敢不修整人言為信日

月為明止戈為武羔美為美人有賢惡事無
巨細得不艱難失必容易斷不決疑斷不可
緩當斷不斷反受其亂人善不趨已惡不除
謂之知道不亦難乎良如金玉重如丘山儀
如鸞鳳氣如芝蘭春無再至花無再開人無
再少時無再來

鳴鶴餘音卷之九

正一天師清微弟子 洪百堅 製作
道教學術資訊網站

太平經鈔甲部卷之一

外一

太平金闕帝晨後聖帝君師輔歷紀歲次平
氣去來兆候賢聖功行種民定法本起

問曰三統轉輪有去有來民必有主姓字可
得知乎善哉子何為復問此乎明師難遭良

時易過不勝囑願欲請聞愚聞冒昧過厚
懼深噫非過也天使子問以問後人今悟者

識正去偽得真吾欲不言恐天袍悒亂不時
平行安坐當為子道之自當了然無有疑也

昔之天地與今天地有始有終同無異矣初
善後惡中間興衰一成一敗陽九百六六九

乃周周則大壞天地混塵人物糜潰唯積善
者免之長為種民種民智識尚有差降未同

泱一猶須師君君聖師明教化不死積鍊成
聖故號種民種民聖賢長生之類也長生大

主號太平真正太一妙氣皇天上清金闕後
聖九玄帝君姓李是高上太之胄玉皇虛無

之胤玄元帝君時太皇十五年太歲丙子兆
氣皇平元年甲申成形上和七年庚寅九月

三日甲子卯時刑德相制直合之辰育於北

玄玉國天岡靈境人鳥闡蓬萊山中李谷之
間有上玄虛生之母九玄之房處在谷陰玄
虛母之始孕夢玄雲日月經其形六氣之電
動其神乃冥感陽道遂懷胎真人既誕之旦
有三日出東方既育之後有九龍吐神水故
因靈谷而氏族用曜景為名字厥年三歲體
道凝真言成金華五歲常仰日欣初對月歎
終上觀陽氣之煥赫下觀陰道以虧殘於是
斂魂和魄守胎寶神錄精填血固液凝筋七
歲乃學春光服霞咀嚙日根行年二七而有
金姿玉顏棄俗離情極化救世精感太素受
教三元習以三洞業以九方三七之歲以孤
棲挫銳四七之歲以仇會和光五七之歲流
布玄津功德遐暢六七之歲受書為後聖帝
君與前天得道為帝君者同無異也受記在
今故號後聖前聖後聖其道一焉上昇上清
之殿中遊太極之宮下治十方之天封掌億
萬兆庶鑒察諸天河海地源山林無不仰從
總領九重十疊故號九玄也七十之歲定無
極之壽適隱顯之宜剛不死之術撰長生之

方寶經符圖三古妙法秘之玉函侍以神吏
傳受有科行藏有候垂暮立典施之種民不
能行者非種民也今天地開闢淳風稍遠皇
平氣隱安厲橫流上皇之後三五以來兵疫
水火更互競興皆由億兆心邪形偽破壞五
德爭任六情肆兇逞暴更相侵凌尊卑長少
貴賤亂離致二儀失序七曜違經三才變異
妖訛紛紛神鬼交傷人物凋喪膏禍荐至不
悟不悛萬毒恣行不可勝數大惡有四兵病
水火陽九一周陰孤盛則水溢百六一市陽
偏興則火起自堯以前不復須述從唐以後
今略陳之宜諦憶識急警防避堯水之後湯
火為災此後偏地小小水火罪重隨招非大
陽九大百六也大九六中必有大小甲申甲
申為期鬼對人也災有重輕罪福厚薄年地
既異推移不同中人之中依期自至中之上
下可上可下上下進退升降無定為惡則促
為善則延未能精進不能得道正可中期隨
功多少是以百六陽九或先或後常數大曆
准擬淺深計唐時丁亥後又四十有六前後

中間甲申之歲是小甲申兵病及火更互為
災未大水也小水徧衝年地稍甚又五十五
丁亥前後中間有甲申之年是大甲申三災
俱行又大水蕩之也凡大小甲申之至也除
凶民度善人善人為種民凶民為混塵未至
少時眾妖縱橫互起疫毒衝其上兵火繞其
下洪水出無定方凶惡以次沉沒此時十五
年中遠至三十年內歲定劇賢聖隱淪大道
神人更遣真仙上士出經行化委曲導之勸
上勵下從者為種民不從者沉沒沉沒成混
塵凶惡皆蕩盡種民上善十分餘一中下善
者天滅半餘餘半滋長日興須聖君明師大
臣於是降現小甲申之後壬申之前小甲申
之君聖賢嚴明仁慈無害理亂延年長壽精
學可得神仙不能深學太平之經不能久行
太平之事太平少時姓名不可定也行之司
命注青錄不可司錄記黑文黑文者死青錄
者生生死名簿在天堂天道無親唯善是
與善者修行太平成太平也成小太平與大
太平君合德大太平君定姓名者李君也以

壬辰之年三月六日顯然出世乘三素景與從飛翽萬龍舉善者為種民學者為仙官設科立典獎善杜惡防遏罪根督進福業之人不怠而精進得成神真與帝合德懈退陷惡惡相日籍充後壺混也至士高士智慧明達了然無疑勤加精進存習帝訓憶識大神君之輔相皆無敢忘聖君明輔靈官祐人自得不死來為種民升為仙真之官遂登後聖之位矣

後聖李君太師姓彭君學道在李君前位為太微左真人皇時保皇道君並常命封授。此民為李君太師治在太微北塘宮靈上光臺二千五百年轉易名字展轉太虛周旋八冥上至無上下至無下真官希有得見其光顏者矣

後聖李君上相方諸宮青童君
後聖李君上保太丹宮南極元君
後聖李君上傳白山宮太素真君
後聖李君上宰西城宮總真王君
右五人一師四輔輔者父也扶也尊之如父

持之得行總號為輔分而別之左輔右弼前疑後承承者發言舉事拾遺充足制斷宣揚即是宰也疑者向思未得啓發成明即是傳也弼者必定預預即是保也扶君順師周市入道即是相也四五占候俱詳可否贊弘正

化總曰輔師閑居之時前向有疑問之傳後顧慮遠問之承右有所昧問之弼左有未明問之輔諮詢四輔相保傳宰成功在師不可闕也聖帝垂範使後遵行入有保保用事也陰屬石靜實真也出有師師用事也陽屬左

動歸寂也至此最難故略輔相而言師也望有傳傳在前敷說議趣也顧有宰宰在後決斷是非也其餘公卿有司仙真聖品大夫官等三百六十一從屬三萬六千人部領三十六萬人民則十百千萬億倍也常使二十四

真人密教有心之子皆隸方諸上相不可具說但諦存其大自究其小也善哉今日問疑更聞命矣
問曰李君何所常行而得此高真太師四輔學業可聞乎善哉子為愚者迷不信道學不

堅固進退失常墮卑賤苦故勤勤問之手今為子說之夫無始中來積行久久一善一惡不可具言之無益今取近所行得成高貴者靈書紫文為要東華玉保高晨師青童大君大君清齋寒靈丹殿黃房之內三年上詣

上清金闕金闕有四天帝太平道君處其左右居太空瓊臺洞真之殿平玉之房金華之內侍女衆真五萬人毒龍電虎覆天之狩羅毒作態備門抱關巨蚪千尋衛於墻堦飛龍奔雀溟鵬異鳥叩喙奮爪陳于廣庭天威煥

赫流光八朗風鼓玄旌回舞旒蓋玉樹激音琳枝自籟衆吹靈歌鳳鳴玄奏神妃合唱麟儻邁天鈞八響九和百會青童匍匐而前請受靈書紫文口傳訣在經者二十有四一者真記諦冥諸憶二者仙忌詳存無忘三

者探飛根吞日精四者服開明靈符五者服月華六者服陰生符七者拘三魂八者制七魄九者佩皇象符十者服華丹十一者服黃水十二者服迴水十三者食鍊剛十四者食鳳腦十五者食松梨十六者食李棗十七者

服水湯十八者鎮白銀紫金十九者服雲膠
 二十者作白銀紫金二十一者作鎮二十二
 者食竹筍二十三者食鴻臚二十四者佩五
 神符備此二十四變化無窮超凌三界之外
 遊浪六合之中災害不能傷魔邪不敢難皆
 自降伏位極道宗恩流一切幽顯荷賴不信
 不從不知不見自是任闇永與道乖塗炭凶
 毒煩惱混塵大慈悲念不可奈何哀哉有志
 之士早計早計無負今言曰善哉善哉今日
 問疑更聞命矣

太平經鈔甲部卷之一

太平經鈔乙部卷之二
 合陰陽順道法還年不老大道將還人年皆
 將候驗瞑目還自視正白彬彬若且向旦時
 身為安著席若居溫蒸中於此時筋骨不欲
 見動口不欲言語每屈伸者益快意心中忻
 忻有潤潤之意鼻中通風口中生甘是其候
 也故順天地者其治長久順四時者其王日
 與道無奇辭一陰一陽為其用也得其治者
 昌失其治者亂得其治者神且明失其治者
 道不可行詳思此意與道合同錄身正神令
 人自知法天之使道生人也且受一法一身
 七縱橫陰陽半陰半陽隨能相成故上者象
 陽下者法陰左法陽右法陰陽者好生陰者
 好殺陽者為道陰者為刑陽者為善陽神助
 之陰者為惡陰神助之積善不止道福起令
 人日吉陽處首陰處足故君貴道德下刑罰
 取法於此小人反下道德上刑罰亦取法於
 此故人乃道之根柄神之長也當知其意善
 自持養之可得壽老不善養身為諸神所咎
 神叛人去身安得善事為善不敢失繩纏不

敢自欺為善亦神自知之惡亦神自知之非
 為他神乃身中神也夫言語自從心腹中出
 侈人反得知之是身中神告也故端神靖身
 乃治之本也壽之徵也無為之事從是興也
 先學其身以知吉凶是故賢聖明者但學其
 身不學他人深思道意故能太平也君子得
 之以與小人行之以傾脩一却邪天地開闢
 貴本根乃氣之元也欲致太平念本根也不
 思其根名大煩舉事不得安並來也此非人
 過也失根基也離本求末禍不治故當深思
 之夫一者乃道之根也氣之始也命之所繫
 屬眾心之主也當欲知其實在中央為根命
 之府也故當深知之歸仁歸賢使之行人之
 根處內枝葉在外令守一皆使還其外急使
 治其內追其遠治其近守一者天神助之守
 二者地神助之守三者人鬼助之四五者物
 祐助之故守一者延命二者與凶為期三者
 為亂治守四五者禍日來深思其意謂之知
 道故頭之一者頂也七正之一者目也腹之
 一者臍也脈之一者氣也五藏之一者心也